

Wat gebeurt der?

Unzen loonwarker stopt met agrarisch wark. Der ging een schok deur de Wenterse gemeenschap en umstreken: "Wat gebeurt der toch no?" 't Betreffende loonbedrief was altied ne vaste weerde in de agrarische wereld en ok daarboeten. 't Ging good met de tied met, had meestal de ni-jste machines en 't was de dreum van heel völle jungskes umme daar ooit te möggen warken; rondveurn met zonnen mooien groten trekker. Veur de boeren is 't bedrief 65 jaor lang ne vasten partner ewes at der eoogst, epot of ezaejd mos wodden, soms hele weekenden lang of töt depe in de nacht at der slecht weer op komst was en 't gewas nog op tied binnen ehaald mos wodden. I-j konnen der altied van op an dat ze klaor stonnen.

De politiek en de maatschappeleke stemming in Nederland bunt echter zo dat ze t leefste hebt dat de moderne veeholderi-je der met stopt. Klimaat en natuur hebt de heugste prioriteit en kennelek komt dee 't meeste in gevaor deur de landbouw. De wetenschappers hebt der teggenstriedege meningen aover en ok de beraekeningen pakt altied weer anders oet, maor ze blijft der bi-j dat der boeren weg mot en al gauw ok. In dit boeronvrendeleke klimaat häökt potentiële bedriefsopvolgers af en hööft de aoverheid neet ens bedrieve oet te kopen, der stopt der van zelf al genog.

Gin wonder dat 'n ondernemmer den wet dat zien klantenbestand onder druk steet en alsmaor kleiner zal worden, gin zin meer hef umme nog risicovol te investeern in ni-je technieken. Verstandeg dat e der op tied met oetscheidt veurdat e in financiële problemen kump. Maor daormet völt ne boom umme in de agrarische wereld en in den val wodt kennis, ervaring, warkgelaegenheid, naoberschap en loyaliteit met-esleurd. Andere bedrieve zölt 't gat wal weer opvullen, maor mot van wieter kommen, hebt neet dezelfde binding met de streek, met de buurtschap. Opni-j geet een aspect van plattelandscultuur verlaorne. 't Is as den blokkentoorn, i-j haalt der 'n steentjen oet en langzaam maor zeker dondert 't hele bouwwark in mekare, zo veult dat manges...

Diana Abbink

November 2022